

ԱՅՑ ԹԻՒՐՔԱՅ ՀԱՅԱՍՏԱՆԻՆ

(հայ տուրիստի յիշողութիւններէց)

ԼԵՒՈՆ ՍԱՐԳՍԵԱՆՑԻ

IV.

ՎԵՐԱԴԱՐՁ

(Մարունակութիւն և վերջ 1)

Դեռ չէր լուսացել նոյեմբերի 28-ը, երբ մենք արդէն թողել էինք գիշերւայ մեր իջևանք և առաջ էինք գնում աստիճանաբար լայնացող ձորով: Լուսանում էր խոնաւ մռայլ օրը:

Ճանապարհի երկու կողմից ծխախոտի ու եգիպտացորենի քաղած դաշտեր էին ձգւած, որոնց մէջ տեղ տեղ երևում էին ծառեր, որոնք ճիւղերի և տերեւների փոխարէն կրում էին իրանց վերայ դիզած եգիպտացորենի չորացած ծղօտներից փափախներ: Ճանապարհից դուրս հանդիպում էին՝ ճկուն ճիւղերը դէպ երկիր կռած լալական ուռենիները: Անցնում էինք մահմեդականների մի գերեզմանատեղի մօտից. ցցւած քարերի արանքներից ուղղահայեաց բարձրանում էին բարակ բրգաձև գլուխներով խորհրդաւոր նոճիները (սելի, *ЕШПАРХСЬ*), որոնք կարծես վառւած հսկայ ճրագներ լինէին դէպ երկինք ուղղած սև բոցերով:

Երթևեկների թիւը, քանի գնում, շատանում էր ցետոտ ճանապարհին: Յոյն գիւղացիք՝ բարձած էշերի վերայ ծխախոտի չորացած տերեւների կապոցներ՝ քաղաքն էին դիմում, իսկ այնտեղից մեր հան-

1) Տե՛ս «Մուրճ»-ի 1889 թ. № 4, 5, 7, 9, 11, 12 և 1890 թ. № 1:

դէպ գալիս էր եւրոպական ապրանքներով բեռնաւորւած ուղտերի ահագին քարւանը, որ հեռաւոր Պարսկաստանից բերած ասիական հում բերքերի փոխարէն այժմ տանում էր եւրոպական արդիւնահանութեան արտադրութիւնները սփռելու թմրած Արեւելքի խորքերում:

Մի ժամ ևս և մենք հասնելու էինք Տրապիզոն, ուր իմ ուղեկցից պիտի բաժանւէինք: Ճանապարհին շատ խնդիրների մասին էինք խօսել նորա հետ և այդ օր աշխատում էինք, այսպէս ասած, վերջացնել բոլոր նախկին հաշիւները: Մեր խօսակցութիւնների մեծ մասը տաճկա-հայերի և ռուսա-հայերի դրութեան և փոխադարձ վերաբերութեան մասին էր: Թիւրքա-հայաստանցիք մեծ համարում և յոյսեր ունին ռուսա-հայերի նիւթական, մոաւոր և բարոյական ուժի վերայ: Պոլսեցիներին համարում են պմբլիկ, թեթեւ, «ան-նիւթ», ինչպէս ասում էր ուղեկիցս:

Իբրև թիւրքա-հայաստանցի, այն էլ վանեցի, Մ. աղան մեծ ոգևորութեամբ էր խօսում, (Խորենացու ոճով ասենք) «բանիւք պայծառ, սիրով անկեղծաւոր, ուսուցանելով անձանձրոյթ» Հայրիկի մասին, որի քարոզների ու առակների ամեն մի խօսքը անջնջելի տպաւորւել էին նորա սրտում: Այն դժբաղդ օրից, երբ ներսէսը պիտի խեցաւ աշխարհից, անկարելի եղաւ այնուհետև նորա գաղափարակիցներին մնալ հայ ժողովրդի մէջ, Հայաստանում. չէր բարձաւ քահանայապետ, խորհրդական և ուսուցանող. վրդովեցաւ խաղաղութիւն, կայկայեցաւ տգիտութեամբ չարափառութիւն և Յարութիւն ու Խորէն կալան զաթուռ պատրիարքութեան...

Այդ օր իմացայ Գիւմիւշհանէի մօտ պատահած դէպքի ժամանակ վանեցու երկիւղի պատճառը: Բանը այն է, որ վանեցիք քանիցս ուղարկել են Սուլթանի անունով աղերսագիրներ, որոնց մէջ պատմում էին հայ ժողովրդի կրած անտանելի հարստահարութիւնները ու թշուառութիւնը տեղական վարչութիւնից: Սակայն այդ գրութիւնները երբէք ուր հարկն է չէին հասնում. դոնէ հետեանքները ցոյց չէին տալիս հակառակը: Այդ տեսնելով վանեցիք յուսահատւած մտածում են ուղարկել մի աղերսագիր ևս իրանց մարդու ձեռքով, որը մի և նոյնն է Պօլիս էր գնում: Գրութիւնը ներկայացնելով ժողովրդի անտանելի վիճակը, աղերսում էր մի ելք այդ՝ ապրելու համար այլ ևս անկարելի դրութիւնից: Ուղեկիցս գիտէր, որ եթէ այդ դրութիւնը, չը

նայած նորա վերին աստիճանի խոնարհ և հպատակասէր բնաւորութեան, ընկնի տեղական պաշտօնեաների ձեռքը՝ բանտ ու յաւիտենական աքսորը կը լինին իրան սպառնող ամենաթեթեւ պատիժները: Դեռ դրանով չէր բաւականանալ տեղական տաճիկ պաշտօնեաների վրէժխնդրութիւնը. անթիւ ձերբակալութիւններ տեղի կ'ուներնային և կը ստիպէին քաղաքի «երեւելիներին» ուղարկել Պօլիս մեծ գոհունակութեան, բարեմաղթութիւնների և դրատների մեծաբարբառ հաւաստիքներ:

— Կը վախնայի սաստիկ, որ զիս պիտ քննեն ու թուղթը գտնեն: Աղէկ եղաւ, որ թոյլ չը տւիք խուզարկել ձեզի. անոնք զբաղեցան ձեզմով՝ զիս ալ մոռցան: Սէմարի (Խուսն) մէջ պահելու էր թուղթն: Սակայն զիտցած եղէք, էֆէնզի՛, որ մեր զրաժը բացի աղաչանք պաղատանքէ, լաց ու գանգատէ, բան մը չէր պարունակիլ իւր մէջ: Ե՛հ, էլ ի՛նչ մեղադրեմ այլազգը, քանի որ մեր մեծաշուք էֆէնզիներ ու աղաներն ալ, արժանապատիւ եկեղեցականներու մեծամասնութեան հետ միասին, հեռու հայրենիքէն փափուկ ու կուշտ ապրելով՝ չեն ուզեր հասկնալ և թեթեւցնել մեր վիճակ, այլ լոկ կըսեն՝ աղէկ է ձեր դրութիւն, համբերէք:

Այդ տեսակ պատգամախօսները պատրաստ կը լինէին մի մարդու, որ դիմէր նոցա՝ «եղբայրս մերձ ի մահ հիւանդ է, օգնեցէք» խօսքերով, պատասխանել. «Դիտա՛ւ չ'ունի, որ մերձ ի մահ հիւանդ է. այդ լաւ է, թող համբերի. ի՛նչ է, լա՛ւ կը լինի, եթէ մի քանի տարիներից յետոյ յանկարծ սաստիկ ձմեռ վրայ հասնի...»: Հրաշալի՛ տրամաբանութիւն: Կարծես, հիւանդի համար աւելի լաւ է հիւանդութիւնից մեռնել քան ենթադրական սառնամանիքի հանդիպել. կարծես, հիւանդը եթէ տանջւի հիւանդութիւնից՝ գալիք սառնամանիքը վրայ չի հասնիլ. կարծես, մտածելով հիւանդին օգնել, ազատել մահից, դրանով հրաւիրում լինին սառնամանիքը բարեհաճել իրանց մօտ այցելելու. կարծես... բաց միթէ հարկաւոր է շարունակել...

— Թող ձեր ռուսահայերը տեսնին իրենց աչքերով զմեր երկիր և ապա դատեն: Ահա, ինչ որ զուք տեսաք, դա Տաճկա-Հայաստանի ամենաբարեկարգ մասն է, զի մօտ է Կարինին, լուսաւոր երկիրներ տանող մեծ ճանապարհին. ազատ է քրդերից ու չէրքէզներից և որքան և է վերահսկողութիւն կայ. բաց չալաստանի խորքերում՝ Երզնկա.

Դերսիմ, Ձմշկածագ, Խարբերդ, Բալու, Մուշ, Բուլանդ, և այլն, ինչ թշուառութիւն կը տիրէ, հարստահարութիւններ և ոճիրներ կը կատարեն—չէք ալ կարող երեւակայել ձեզ: Հողերը, գիւղերը՝ քիւրդ և տաճիկ բէգերի կալածներն են. հայ գիւղացիները իրանց մալով, տնով-տեղով այդ բէգերի և աղաների մարիբաններն են, ճորտերն են: Կառավարութեան տուրքը, ըստ կարգին, գիւղացին կը տայ, բէգին և աղային հարկ էլի նոյն գիւղացին, ղափթին, միւլթէզիմի և միւղիրի հաճոյքներին գոհացում տուող՝ կրկին նոյնը: Քիւրդը սպանի հային՝ մեղաւորը հայն է. հայը ղինքը պաշտպանելով զարնէ քիւրդին՝ մեղը իրանն է: Այդ խուլ անկիւններում ո՛վ ինչ կարող է, անում է, օրէնք ասածը է՝ «սահմանք քաջաց զէնք իւրեանց» որքան հատանի այնքան ունի...

Լայնացած ձորի երկու կողմից ընթացող սարերը իջել խոնարհւել էին իրանց բարձրութիւնից՝ հանգ ծովին մօտենալով: Մի բլրակ էր ինձ բաժանում ծովից. քշելով ձիս վեր բարձրացայ և անպատմելի ուրախութեամբ տեսայ ձըւած իմ առջև ազատ ծփող լայնածաւալ ջրային տարածութիւն: Հասկանալի էր այժմ ինձ այն ցընծութիւնը, որ տիրեց Քսենոֆոնի զինւորներին, երբ, աւելի քան երկու հազար տարի մեզնից առաջ, ձմեռը Պարսկաստանից հայրենիք վերադառնալիս, Հայաստանի բարձրաւանդակներում կրած սարսափելի նեղութիւններից յետոյ՝ տեսան նոքա, վերջապէս, իրանց առաջ Սև ծովը:

Նոյնանման ուրախութիւն զգում էի և ես: Ինձ թւում էր թէ ես կրկին լոյս աշխարհ դուրս եկայ մի մութ, սարսափելի բանտից, ուր ցնցոտիներ, թշուառութիւն, տանջանք և բռնութիւններ էի տեսնում: Բարձր անմատչելի սարերը, ապառաժները և խոր ձորերը այդ բանտի պատերն էին:

Ծփում էր իմ առաջ Սև ծովը. ուռած ալիքները խաղում էին իրանց մօր լայն զրկում: Ափերին մօտենալով նոքա շարուում էին կարգ կարգ և վազում յարձակում ծովը կաշկանդող մուսլ անշարժ ափերի վերայ, բայց չը կարողանալով խորտակել այդ զօրեղ կապանքը, գոռում գոչում էին, փրփրում կատաղութիւնից և շիթեր երկինք բարձրացնում ու յետ նահանջում շառաչելով, որպէս զի նորից միանալով յետեից եկող ալիքների հետ՝ կրկին յարձակեն ան-

մոռունջ երկրի վերայ: Եւ այսպէս աննկուն մաքառում են անվհատ խիզախ ալիքները անսիրտ ցամաքի դէմ և կամաց-կամաց դարերի ընթացքում մաշում, քերում նորա կուրծքը, յուսալով մի օր ազատել նրանից...

Զախ, ծովի ափին, երկայն բլուրի վերայ և ստորոտում նոճիների, նարնջի ծառերի և ձիթենիների խմբերի միջից երևում էին Տրապիզոնի անշուք տները: Նաւահանգիստում կանգնած էին մի քանի նաւեր:

Մի շարք կրպակներ և ծովի վերայ շինած զարշահոտ «տեղեր» իմաց էին տալիս, թէ քաղաքն ենք մտել: Յածրիկ մաքսատան մօտ դուրս եկաւ մեր առաջ մի տաճիկ պաշտօնեայ, որ պահանջեց մեզանից մեր անցաթղթերը և հրամայեց իջնել ձիերից, որպէս զի խուզարկի բեռները: Վանեցին կոխեց ձեռը ջիբը մի քանի սև փող հանելու, իսկ ես մինչև մտածէի ինչ անել, ձիապանները խորհրդաւոր կերպով փսփսացին տաճիկի ականջին.

— Զանապարհին ոչ միւղիրին, ոչ էլ միւթեսարի՜Ք փաշային թոյլ տւեց էֆէնդին խուզարկել իրան, երեւի...

Տգէտ պաշտօնեան յետ քաշեց պատկառանքով և մենք շարունակեցինք մեր ճանապարհը նոյն ծովնորեայ փողոցով:

Հասնելով մի հրապարակ՝ բաժանւեցինք վանեցուց: Զիապանս տարաւ ինձ քաղաքի կենդրոնում դտնւող մի հիւրանոց, որի ներքեւի յարկում թէյարան-ղայվէարանն էր, իսկ վերեւի՝ համարներ: Փայտեայ սանլուղքներով փողոցից բարձրացանք վերեւի յարկը: Գարշահոտ նրբանցքի երկու կողմից դռներ էին, որոնցից մէկը բացեց իմ առաջ հայ հիւրանոցատիրոջ որդին: Չոր ցեխից անիմանալի տախտակամօճը, աղքատիկ կահ կարասիքը, դէպի փողոցը նայող ճեղքւած ապակիներով երկու պատուհանները և սպիտակած բարակ տախտակներից պատերը՝ որոնց մէջ եղած լայն ճեղքերը, կարծես, հարւան սենեակների մէջ օդափոխութիւնը դիւրացնելու նպատակով թողած լինէին՝ ցոյց էին տալիս, որ եւրոպականութիւնը դեռ քիչ է մտել այդ կեանքի մէջ:

Ժամի 4 էր, երբ ես հիւրանոցի հայ ծառայի ուղեկցութեամբ գնացի ուսաց հիւպատոսարանը, որ գտնւում էր քաղաքիս ամենալաւ փողոցներից միւսում: Նա այնքան նեղ էր, որ եթէ մի

բեռնած էշ (կառք սովորութիւն չը կայ բանացնել) անցնելիս լինէր, պէտք է անցորդը տների պատերին կպչէր, որպէս զի ակամայ պատկառանքով ճանապարհ տար բեռնաբարձ երկայնականջին: Ինչ ասել կ'ուզի, որ մայթեր (տրոտուար) չը կան քաղաքում:

Հիւպատոսարանը քաղաքիս ամենալաւ տներից մէկումն էր զետեղւած:

Ճանտաստիկական գեղեցիկ հագուստով, արծաթապատ ատրճանակները ու խէնջարը լայն գոտիում խրած սկաւաքը մի ենիչերիի էր նմանում: Նա յայտնեց իմ մասին հիւպատոսին, որ հրաւիրեց ինձ վերեւ իւր մօտ: Այդ շինութեան երկրորդ յարկի եւրոպական ճաշակով շքեղ կահաւորւած սենեակներում ապրում էր հիւպատոսը իւր ընտանիքով:

Պարճ խօսակցութեան մէջ, ի միջի այլոց, ես պատմեցի հիւպատոսին Գիւմիւհշանէի մօտ ինձ հետ պատահած դէպքը: Նա ասաց, որ երբեք միւթեարիֆին «վէքիլ» չի արել, և որ տաճիկ վարչութեան վարմունքը ինձ հետ բոլորովին ապօրէն էր և ես կարող էի ոչինչ զիջումներ նրանց չ'անել: Նա հրաւիրեց ինձ երեկոյեան իւր մօտ:

Հիւպատոսարանին կից էր Տրապիզօնի ազգային տղայոց վարժարանը: Որովհետեւ մինչև երեկոյ տեղ չ'ունէի գնալու, ես լաւ համարեցի գնալ ուսումնարանը և ծանօթանալ ուսուցչական խմբի հետ:

Դասերը աւարտած էին: Աշակերտները ցոյց տւին ո՛ր սենեակում էր գտնւում տեղիս ազգային ուսումնարանների տեսուչը՝ կովկասեցի պ. Դ. Բայանթարեանը: Անկեղծ ուրախութեամբ ընդունեց նա ինձ, ծանօթացրեց ուսուցիչների հետ, ցոյց տւեց մի քանի դասարաններ, պատրաստականութեամբ հաղորդելով բոլոր հարկաւոր տեղեկութիւնները:

Տրապիզօնի ազգային տղայոց վարժարանը ունէր երկու բաժանմունք. ծաղկոց և ուսումնարան: Առաջինը բաղկացած էր 3 դասարաններից, իսկ երկրորդը՝ 4: Աշակերտների թիւը 400 էր, ուսուցիչներինը՝ 11: «Մաղկոցում» աւանդւում էին հայոց լեզու, թւաբանութիւն, տեղական աշխարհագրութիւն, բարոյագիտութիւն, իրազիտութիւն, գեղագրութիւն, գծագրութիւն և տարրական մարմնամարզ: Իսկ ուսումնարանում՝ հայերէն, ֆրանսերէն, թուր-

քերէն, ազգային և ընդհանուր պատմութիւն և աշխարհագրութիւն, թւարանութիւն, բնական պատմութիւն, Ֆիզիկա, կրօն, գեղագրութիւն, գծագրութիւն և ձայնական երաժշտութիւն: Նորընտիր տեսուչը մտադրութիւն ունէր նոյնպէս մտցնել ցանկացողներին համար արհեստներ:

Տրապիզոնի վարժարանը տաճկա-հայերի ամենալաւ ուսումնարաններից մինն է և կարող էր հեշտութեամբ ունենալ մի երկու բարձր բաժանմունք ևս վարժապետներ պատրաստելու համար և այդպիսով յայտնի չափով կը լրացնէր այն պակասը, որ ամբողջ Թիւրքիայում հայերը ոչ մի վարժապետանոց չ'ունին: Նամանաւանդ կարեւոր կը լինէր նա այստեղ այն պատճառով, որ Տրապիզոնը և՛ մօտ է Հայաստանին և՛ ազատ է այն պայմաններից, որոնք արգելք են դնում բուն Հայաստանում մի այդպիսի հիմնարկութիւն ներկայումս: Եւ դորա համար շատ քիչ զոհաբերութիւն է հարկաւոր, տարեկան մի 1500 բուբլի, որ կարող էին տալ կովկասեցիք:

Իմ նոր ծանօթներս խաջարկեցին ինձ միասին գնալ տեղիս ակումբը, որը ուսումնարանից հեռու չէր:

Անցնելով եւրոպական ձևով մաքուր կահաւորած դահլիճով, որի մէջ տեղում բիլիարդի մի մեծ սեղան էր դրած, և աչքի անցկացնելով Կովկասից ստացած թերթերը, որ երկու ամիս ձեռս չէին ընկել (այդ տեղ առաջին անգամ իմացայ «Մուրճ»-ի հրատարակութեան մասին), մենք սլաութիւնեցիք թէյ և առանձնացանք մի սենեակում: Այստեղ արձակ համարձակ կարող էի խօսել՝ Կարինի բոլիսներից չը վախենալով: Ինձ պաշարում էին հարցումներով Հայաստանից: Տրապիզոնցիներին համարեա նոյնքան է ծանօթ Թիւրքաց-Հայաստանի վիճակը, որքան, օրինակի համար, Բաթումի հայերին: Տրապիզոնը՝ ինչպէս և Պոլիսը, Զմիւռնիան ու Տաճկաստանի ծովեզրեայ քաղաքները, շփելով եւրոպացիների հետ և մշտական հաղորդակցութիւն ունենալով լուսաւոր երկիրների հետ՝ ունի կեանքի բոլորովին այլ պայմաններ, քան Փոքր-Ասիայի կամ Հայաստանի կենդրոնները, որոնք համարեա բոլորովին կտրւած են լոյս աշխարհից և մատնւած միանգամայն խաւարի, կամայականութեան ու թշւառութեան:

Երեկոյեան նշանակած ժամանակին գնացի հիւպատոսի մօտ, ուր

կային և մի քանի հիւրեր, որոնց մէջ և Ֆրանսիական ու պարսից հիւպատոսները: Հիւպատոսը ինձ ծանօթացրեց իւր ամուսնու և հիւրերի հետ և մի քանի ժամանակից յետոյ բոլորս հրաւիրեցանք սեղանատունը:

Եւրոպական զանազան պետութիւնների ներկայացուցիչները աշխատում են տարածել իրանց կառավարութիւնների ազդեցութիւնը Տաճկաստանում և մանաւանդ նորա ամենաընդունակ սարրերի վերայ—հայերի և յոյների... Որտեղ գէշ կայ՝ այնտեղ անգղիներն են ժողովում... Բանը այնտեղ է հասնում, որ հանրապետական ազատամիտ Ֆրանսիան պաշտպանում է Տաճկաստանում իւր երկրից աքսորած եզդիտներին և օգնում ամեն կերպ կաթօլիկ պրօպագանդային: Տրապիզոնում, բացի հայ-կաթօլիկների ուսումնարաններից, որոնց թէ Ֆրանսիական և թէ իտալական հիւպատոսները հովանաւորում են, կան նոյնպէս «կապուցին ֆրերների» տղայոց ուսումնարան և զուտ Ֆրանսիական ու իտալական երկսեռ վարժարաններ 4 տարւայ դասընթացով: Այդ երեք ուսումնարանում սովորում էին 210 տղայ և 110 աղջիկ, որոնցից հայերը՝ 100 տղայ և 45 աղջիկ, մնացածը յոյների և եւրոպացիների զաւակներ էին: Իսկ հայ-կաթօլիկների դպրոցները, որոնցից տղայոցը Վենետիկի Մխիթարեաններն են պահում, իսկ աղջկանցը՝ Անարատ յղութեան քոյրերը, ունէին 100 աշակերտներ և 75 աշակերտուհիներ:

Անգլիական հիւպատոսարանը հովանաւորում է հայ բողոքականների դպրոցներին, ուր անգլիական լեզուն ու ազդեցութիւնն են տիրապետում: Նիւթական նպաստ ստացւում է Ամերիկայի «Պօրտ» ընկերութիւնից. սովորողների թիւը՝ 20 տղայ և 12 աղջիկ, 2 ուսուցիչներով:

Ի դէպս է այստեղ ասել և մի քանի խօսք թուրքերի ուսումնարանների մասին: Տեղեկութիւնները հաղորդեց ինձ մի վստահելի և տեղեակ անձնաւորութիւն՝ պ. Պ. Մ.:

Տրապիզոնում կայ կառավարութեան կողմից 1886-ին բացած մի տղայոց «միջազգային դպրոց», որ մինչև այժմ ոչ մէկ արդիւնք չի տւած: Թէպէտ «միջազգային» է, սակայն ոչ մի քրիստոնեայ չը մտաւ այդ տեղ: Ծախքը ծածկելու համար մի պարզ միջոց ընտրեցին, — տասանորդի տուրքի վերայ «յաւելուած մը ընել», պօլսե-

ցիւնների ոճով ասենք: Աշակերտների թիւը, իմ ժամանակ, 80 էր, դասարաններինը՝ 5, ուսուցիչներինը՝ 6: Աւանդելի առարկաններն, գոնեա թղթի վերայ, էին՝ թուրքերէն, արաբերէն, ֆարսերէն, ֆրանսերէն, թւաբանութիւն, ալգեբրա, երկրաչափութիւն, աշխարհագրութիւն, պատմութիւն, բնական պատմութիւն, երկրագործութիւն, գեղագրութիւն, գծագրութիւն:

Բացի այդ կայ կառավարական թուրք տղայոց ուսումնարան, որի ծախքը, տարեկան մօտ 2.700 ռուբլի, նոյն աղբիւրից է, 360 աշակերտներով և 6 ուսուցիչներով: Յայտնի անբնական մոլութիւնը, թէև սարսափելի տարածւած է բոլոր թրքական ուսումնարաններում, սակայն բոլորից գերազանցում է սորանում:

Քաղաքիս թիւրքաց լաւագոյն դպրոցը համարւում է նրանց զինուորական վարժարանը, որի ծախքը նոյն աղբիւրից է: Դասարանների թիւը 4 է, ուսուցիչներինը՝ 11, աշակերտներինը՝ 400: Աւանդւում են թուրքերէն, արաբերէն, ֆարսերէն, ֆրանսերէն լեզուներ, թւաբանութիւն, տարրական ալգեբրա և երկրաչափութիւն, կրօնք, գեղագրութիւն, աշխարհագրութիւն և Օսմանեան պատմութիւն:

Բացի այդ կան թաղերում՝ այսպէս անուանած՝ տարրական ուսումնարաններ (սիբեան) մի մի ուսուցիչով իւրաքանչիւրում: Այդ ուսումնարաններում ուսումը տեւում է մի տարի. նոցա թիւը 15 էր, տղաների թիւը բոլորում ի միասին առած՝ 490: Սովորեցնում են թուրքերէն, Ղուրան և ամենատարրական թւաբանութիւն: Թուրքաց աղջկանց համար ուսումնարանները միմիայն այդ տիպին են պատկանում: Ամբողջ Տրապիզօնում 3 այդ տեսակ ուսումնարան կային, ընդամենը 25 աշակերտուհիներով: Ուրեմն 21 հազար տաճիկ բնակիչներ ունեցող Տրապիզօնում միմիայն 25 թիւրք աղջիկ էր սովորում կարդալ և գրել:

Վերջապէս մէլէդներ լինում էլ կան («մէլդրեսներ»), որոնց մէջ սովորողների թիւը ընդամենը 100 էր: Ղուրան, ծէսեր, արաբերէն, թուրքերէն և գեղագրութիւն, — ահա՛ մատակարարուող գիտութիւնը այդ կրօնական ուսումնարաններում:

Այս բոլորից յետոյ մարդ ակամայ լիշում է Րընանի «Գիտութիւն և Իսլամ» ճառից հետեւեալ խօսքերը. «Մուսուլմանական երկիրների ժամանակակից թուլութիւնը ակնյայտնի է իւրաքանչիւրին՝ ով որ-

քան և է ծանօթ է գործերի դրութեան, կատարելապէս ակնյայտ-
նի ընկածութիւնը այն տէրութիւնների, ուր տիրում է իսլամը,
մտաւոր ոչնչութիւնը այն ցեղերի, որոնք պարտական են իրանց
կուլտուրայով և կրթութեամբ բացառապէս այդ կրօնքին... Կարծես,
մի երկաթեայ մամուլ ճնշում է իւրաքանչիւր ուղղահաստի գլուխը
և դարձնում նրան բոլորովին անընդունակ գիտութեան համար, ան-
ընդունակ մի որ և է բան ուսանելու, ըմբռնելու որ և է նոր գա-
ղափար... Անմիտ հպարտութիւնը—իւրաքանչիւր մուսուլմանի ար-
մատական պակասութիւնն է»:

* * *

Երեկոյեան ժամի 8-ից անց էր, երբ ես կաւասի ուղեկցու-
թեամբ, որ լապտերը բռնած լուսաւորում էր ճանապարհը, որով-
հետեւ Տրապիզոնում փողոցներ լուսաւորելը դեռ անհրաժեշտ չի
համարւում, վերադարձայ սենեակս:

Վառելով ճրագը՝ ուզում էի պատուհանների շիւա վարագոյր-
ները իջեցնել և հէնց ձեռք տարել էի կապերը արձակելու, որ սար-
սափած յանկարծ տեսայ մատներիս տակ մի սև կարիճ, որ պոչը
բարձրացած իւր թունաւոր խայթոցով պատրաստւում էր ինձ խայ-
թել: Կանչեցի ծառային, որ սպանի նրան և տեսնի արդեօք անկողնի
մէջ էլ չը կան:

Մինչ ես նստած աթոռի վերայ խօսում էի այդ հայ ծառայի
հետ, աննկատելի կերպով մօտեցել էր սենեակիս կիսաբաց դռան մի
յաղթանդամ տաճիկ սպայ՝ կարմիր ֆէսը ծուռ դրած գլխին և ձեռ-
ները կոխած վարտիկի ջիբերը. նա կանգնած նայեց մի քանի րոպէ
և յետոյ առանց թոյլտուութիւն խնդրելու յանդգնութեամբ մտաւ
սենեակս և չը թողնելով իւր երեսի արհամարհական հեգնական ժպիտը՝
սկսեց ոտքից ցզլուխ ինձ չափել իւր լիւր հայեացքներով ու
հարցնել թէ ո՛րտեղացի եմ, ո՛վ եմ և ո՛ւր եմ դնալու: Նս չը պա-
տասխանեցի և չը շարժւելով տեղիցս, զարմացած նայում էի այդ
անկուհ հիւրի ձևերի վերայ: Ստրկահոգի ծառան շողքորթութեամբ
պատասխանում էր էֆէնդիի հարցերին:

Սպան տեսնելով որ ես ոչինչ ընդդիմադրութիւն չեմ ցոյց տա-

լիս՝ կրեչենգո բարձրացնում էր թէ իւր ձայնը և թէ լրբութիւնը։ Նա նստեց իմ հանգէպ՝ մահճակալիս վերայ և ասաց. «հա՛, ուրեմն դու ռուսաստանցի ես, բայց չը գիտե՞ս, որ քո առաջ սպայ է նըստած. մեզանում երբ զինւորական է մտնում՝ պէտք է վեր կենալ և ոչ թէ դեռ ոտներն էլ առջևը մեկնել. քաշի՛ր ոտներդ, բղաւեց նա խփելով իւր ոտներով իմ ոտներին։ Ինչպէս երևում է, իմ ոտներս ծակում էին տաճիկ զինւորականների աչքերը։ Ես աշխատեցի զըսպել բարկութիւնս և ասացի ծառային. «յայտնի՛ր այդ մարդուն թէ՛ ես պահանջում եմ, որ նա այս րոպէիս թողնի սենեակս»։

Ծառան յայտնեց նրան նոյնը աւելի մեղմացրած ձևով։

— Զայնդ կտրի՛ր, քեաֆի՛ր, ես հրամայում եմ, անհաւատ հայ, որ քաշես ոտներդ և կանգնես իմ առջևս, թէ ոչ ես քեզ ցոյց կը տամ... գորգուում էր անզուսպ տաճիկը։

Նս ցոյց տալով դէպի դուռը և կատաղութիւնից զոդողալով ասացի.

— Դո՛ւրս. այս րոպէիս դո՛ւրս։

— Ա՛խ դու անհաւատ. է՛յ, դիմեց նա ծառային. կանչի՛ր այս տեղ Օսման էֆէնդուն... ես այս անպիտան հային պիտի ծեծեմ։

Ահից սարսափած ծառան վազեց կանչելու սպայ Օսմանին. իսկ ես վեր կացայ տեղիցս, վերցրի թախտի վերայ գցած ընկուկերս և ուղղելով լրբի կուրծքին՝ գոռացի.

— Դո՛ւրս...

Նա չէր սպասում հայից մի այդպիսի վարմունք, ապշած յետ-յետ քաշւեց. բայց տեսնելով դրան մօտ Օսմանին, կրկին սկսեց գորգուալ... Սակայն ես արդէն զինքս կորցրել էի. կատաղի հրում էի իմ առջև խռնւած մարդկանց, որպէս զի խփեմ սպային, որի ընկերը պահում էր ընկուկեր բռնած ձեռս, իսկ ծառան միւս ձեռիցս էր քաշում։ Իմ հակառակորդին փախցրին իւր համարը։

Բոլորը թափւել էին սպայի սենեակը, որ դեռ շարունակում էր գորգուալ, բայց հիմա գանգատաւորի ձայնով. ինձ մօտ մնացել էին մի քանի հայ վաճառականներ, որոնք բնական էին զտնում տաճկի պահանջը և անխոհմտութիւն իմ կողմից ընդդիմանալու։ Երբ ես նրանց ասում էի թէ՛ հէնց իրանց այդ վախկոտ զիջողութեան հետևանքն է այդ տեսակ տաճիկների լրբութիւնը, կրկնում էին թէ՛ ի՞նչ կարող են

իրանք անել, ոչ դատաստանն է իրանց կողմը և ոչ ոյժը: Եթէ իրանց մշտական զինոցութիւնները և ակամայ քաղցր վարւողութիւնը չը լինէր՝ անկարելի էր ապրել այդ երկրում:

Ծառան արդէն անհետացել էր. ես կանչում էի նրան որպէս զի ուզարկեմ հիւպատոսարանը կաւասին բերելու: Վերջապէս նա երևաց նրբանցքի մի անկիւնից սարսափած, սպրտնած, բերանը չորացած, աչքերը չռած: Նա ոտների մատերի վերայ էր մանգալիս և փսփսալով խօսում, որպէս զի սպան չ'իմանայ թէ սա ինձ օգնում է. վախենում էր վրէժխնդրութիւնից: Այդ բոպէին կանչեց նրան իւր սենեակից սպան և նա իսկոյն թողեց ինձ և վազեց նորա մօտ և վերադառնալով ուղում էր տեղեկանալ՝ արդեօք լի՞քն էր ընկնուկներս թէ դատարկ:

— Կարող ես յայտնել պարոնիդ թէ այո՛, լի է 6 գնդակով և մօտս կայ մի այլ ընկնուկ ևս ու 200 փամփուշտ: Այդ յայտնելուց յետոյ՝ կառարի՛ր իմ հրամանս և կանչի՛ր այստեղ կաւասին:— Նա դեռ չէր ուղում գնալ, բայց ես սպառնալով ստիպեցի: Անկատելի կերպով նա դուրս եկաւ հիւրանոցից:

Եկաւ կաւասը: Պատմեցի եղելութիւնը, որպէս զի իմաց տայ հիւպատոսին, խոստանալով առաւօտեան ինքս աւելի մանրամասն պատմելու: Բացի այդ, խնդրեցի կաւասին բերել այժմ և տաճիկ բօլիսներից մէկին:

Մի քանի բոպէից յետոյ վերադարձաւ կաւասը բօլիսների մէկի հետ և յայտնեց թէ հիւպատոսը խնդրում է, որ գնամ իւր մօտ գիշերը անցկացնելու, որովհետեւ բան կարող է պատահել: Ես շնորհակալութիւնս խնդրեցի յայտնել, ասելով որ գիշերը այստեղ կը մնամ:

Բօլիսին պատմելու համար հարկաւոր էր որ և ծառան ներկայ լինէր, որովհետեւ նորա աչքի առջև սկսեց այս անախորժ դէպքը, բայց նա՝ վախենալով տաճիկ առջև տաճիկ դէմ աննպաստ ցուցմունք անել՝ չէր գալիս: Որպէս զի աւելի ազատ կարողանամ պատմել տաճիկերէն իրողութիւնը՝ ես ստիպւած էի հարևան հայերից մէկին կանչել իբրև թարգման: Բօլիսը աշխատում էր մեղմացնել գործը և մինչև անգամ արդարացնելով սպային, մեղադրել ինձ, ասելով թէ, ծառայի խօսքերին նայած, ես առաջինը սկսեցի կռիւ:

ես պահանջեցի, որ ծառան զայ և նոյնը ասի իմ ներկայութեամբ, բայց նա թագ էր կացել:

— Լա՛ւ, այդ վաղը կը տեսնենք, ո՛վ է մեղաւորը. իսկ հիմա նախազգուշացնում եմ ձեզ, որ եթէ այն լիբրը համարձակեց մօտենալ սենեակիս դռան, ես առանց այլ և. այլութեան արձակելու եմ ընկելքերս նորա վերայ, պատասխանեցի ես:

Բոլորը հեռացան սենեակիցս. ես պնդացրի թոյլ կողբող բարակ դուռը և երկար վրդովմունքից չէի կարողանում հանգստանալ:



Միւս առաւօտ, նոյեմբերի 29-ին, լւացւում էի. իսկ երեկւայ հայ ծառան պատմում էր, որ տաճիկ սպան շատ շուտ վեր էր կացել և առանց թէյ խմելու գնացել իւր ծառայութեան և որ արդէն քաղաքում բոլորը խօսում են գիշերւայ դէպքի մասին, թէ ինչպէս մի ուսանող ուզում էր ընկելքերով սպանել մի տաճիկ օֆիցերի:

Թէյի ժամանակ ծառան մտաւ մօտս յայտնելով, որ Օսման է-ֆէնդին խնդրում է թոյլտուութիւն ինձ տեսնելու:

Ներս եկաւ երեկւայ սպան, որ կռի ժամանակ բռնել էր իմ ձեռքս: Նա եկել էր տեղեկանալու թէ ի՞նչ եմ մտադիր անել և չէ՞ր կարելի արդեօք ազատել իւր ընկերին: Նա սկսեց նրանից, որ ներողութիւն խնդրեց իւր ընկերոջ համար, առարկելով թէ նա թէյի հետ երևի քիչ բո՞ւմ էր խմել և քէֆով էր եղել և հէնց է իմացել թէ մի հասարակ հայ էք:

— Հէնց հասարակ հայ էլ կամ. այնու ամենայնիւ այդ իրաւունք չէր տալիս ինձ հետ այնպէս վարւելու. ինձ համար մի և նոյն է՝ ձեր ընկերը բո՞ւմ էր խմել թէ կօնեակ: Ես մինչև բաւականութիւն չը ստանամ չեմ թողնելու այդ գործը, պատասխանեցի ես:

Օսմանը դուրս եկաւ շատ քաղաքավարի կերպով գլուխ տալով: Մի քանի բոպէից յետոյ կրկին մտաւ ծառան, ասելով թէ մի տաճիկ ուզում է ձեզ տեսնել: Թոյլ տւի զալ: Մտաւ մի երիտասարդ բաշ-բօլիս, քաղցր շողոքորթ ժպիտը երեսին, քաղաքավարութեամբ և յարգանքով գլուխ տւեց և սկսեց բարձր ոճով արտա-

յայտել իւր խորին ցաւակցութիւնը երեկւայ անխորժ դէպքի համար:

—Եթէ ես գիտենայի, որ մի այդպիսի թանկագին հիւր էիջել այս համարներում, մի՞թէ ես կը հեռանայի գիշերը հիւրանոցի մօտից, մի՞թէ թոյլ կը տայի, որ նրան մէկը վիրաւորի, և այլ այսպիսի գեղեցիկ խօսքեր էր ասում:

Դորա փորացաւը այն էր, որ վախենում էր, եթէ ես խնդիրը հիւպատոսարանի միջոցով բարձրացնեմ, ֆուսսի ինքը ևս, իբրեւ այդ թաղի հանգստութեան վերահսկող: Այդ պատճառով հարցնում էր թէ ի՞նչ եմ մտադիր անելու և ո՞ւմ գանգատւելու: Տաճիկը միայն վախենում է օտարահպատակի հետ գործ ունենալուց:

Սա էլ հեռացաւ և սենեակս մտաւ հիւրանոցատիրոջ որդին, որ ներողութիւն էր խնդրում կատարւածի համար և ասում էր, թէ ահա մի ամիս է որ այն սպան ուտում է, խմում և ոչինչ չի վճարում, իսկ գանգատւել՝ ուր հարկն է՝ վախենում են:

Թէից յետոյ գնացի հիւպատոսարանը: Հիւպատոսը, լսելով մանրամասն բոլոր եղելութիւնը յայտնեց, որ երկու միջոց կայ խնդիրը բարձրացնելու. կամ հրապարակական դատ սկսել, որ շատ ժամանակ կը լսի և մեծ աղմուկ կը հանի, կամ գանգատւել սպայի անմիջական իշխանութեան՝ տեղիս գեներալ-փաշային: Ես ընտրեցի երկրորդը և հիւպատոսարանի հայ թարգմանի հետ դիմեցի ծովափին գտնուող զինւորական շինութիւնը:

Դեռ փաշան չէր եկել. ցած շինութեան առջև կանգնած էր պահապանը և մի քանի սպաներ: Փողոցի ծայրին ահա երեւաց մի հաստափոր զինւորական, որը սիգաճեմ քայլածքով մօտենում էր շինութեան: Նորա յետեից խոնարհաբար հետևում էր սևազգեստ ծառան: Զինւորական փողը հնչեց և ողջունը տւին: Թարգմանը մօտեցաւ նրան և յայտնեց թէ խնդիրը ունինք: Նա հրաւիրեց հետևել իրան: Մտանք մի մեծ սրահ՝ եւրոպական ձևով աղքատ կահաւորւած. փաշան իւր սուրը հանեց և տւեց իւր օգնականին և գնացինք սրահին կից սենեակը, որի մեծ պատուհանները նայում էին ուղիղ ծովի վերայ: Ինքը նստեց մի ցածր աթոռի վերայ, որին կպած մի փոքրիկ սեղան էր շինած և մեզ ցոյց տւեց իւր հանդէպ գտնուող թախտը: Հրամայեց մի մի ֆինջան դահլէ բերել և առաջարկեց ծխել:

Իւր օգնականի մատուցած մի քանի հեռագիրներ ու թղթերը կարդալուց յետոյ, նա դիմեց մեզ իմանալու մեր այցելութեան պատճառը:

Թարգմանը պատմեց մանրամասն բոլոր եղելութիւնը և վերջը աւելացրեց, թէ ռուսաց կօնսուլը խնդրում է լուրջ ուշադրութիւն այս գործի վերայ և խիստ պատիժ մեղաւորին: Նա տաճկական շողոքորթութեամբ պատասխանեց թէ կօնսուլի խնդիրքը իւր համար հրաման է և թէ կարող ենք վստահ լինել, որ ամենախիստ կերպով կը պատժւի մեղաւորը և ապա դիմեց իւր օգնականին յայտնելով մեղաւոր օֆիցերի մասին: Օգնականը ուղեց օֆիցերին պաշտպանել ասելով, թէ այն օֆիցերը, որի մասին մենք գանգատուում ենք, ամբողջ գիշերը չի հեռացել զօրանոցից: Ես ասացի, որ նա առաւօտ կանուխ է վերադարձել զօրանոցը: Փաշան մեզ յայտնեց, որ հիմա նա կը կանչի օֆիցերին, իբրեւ թէ յանձնարարութեան համար, և երբ նա հեռանայ՝ ես յետոյ ասեմ արդեօք դա՞ էր:

Օֆիցերը մտաւ. տեսնելով ինձ թարգմանի հետ, այլապէս ու սպրտնեց և ստանալով փաշայից թղթերը՝ հեռացաւ:

Ես յայտնեցի որ հէնց դա ինքն էր երեկւոյ հերոսը և աւելացրի, թէ այն կարճ ժամանակամիջոցում որ ես անցկացրի Տաճկաստանի ա մ ե ն ա բ արեկարգ անկիւններից մէկում, այս առաջին դէպքը չէ որ պատահում է հետո: Ի՞նչ կարծիք կարող են օտարականները կազմել Տաճկաստանի մասին, երբ նոքա անգամ՝ չը նայած իրանց հիւպատոսարանների հեղինակութեան՝ ենթարկւում են այդ տեսակ վիրաւորանքների:

— Ամեն երկրում լինում են վատ մարդիկ, էֆէնդմ, պատասխանեց փաշան և խոստանալով խստութեամբ պատժել յանցաւորին, շատ քաղաքավարի կերպով ճանապարհ դրեց մեզ, խնդրելով թարգմանին հանգստացնել հիւպատոսին:

Տեղը չէր, ի հարկէ, ապացուցանելու, որ այն դէպքերը որ ինձ հետ պատահեցին, և այն երեւոյթները որ ամեն քաջափոխում մարդ նկատում է այդ երկրում՝ մասնաւոր չեն: Մարդկանց բարոյական գծերը և հասարակական ձգտումների զարգացումն էլ նոյն ֆակտորների ազդեցութեան են ենթարկւում, որոնց և օրգանիզմների ձևերի զարգացումը, ինչպէս ուսուցանում է այդ էվոլիւցիայի օրէնքը:

Այդ երեք ֆակտորներն են՝ միջնավայրը, ժառանգականութիւնը և ընտրողականութիւնը (selection): Տաճկին շրջապատող ընտանեկան-հասարակական միջնավայրը, նորա միջին-ասիական նախահայրերից ժառանգածը և այդ երկրում ներկայ պայմաններում գոյութեան կուլի մէջ առաւելութիւն ունենալու (ընտրողականութիւն) համար հարկաւոր յատկութիւնները՝ կոպիտ ոյժը, մահմեդական ծագումը, ստոր տեսակի խորամանկութիւնը և այլն՝ չեն նպաստում, որ այդ երկրում երևան գան առաքինի լուսաւոր անձնաւորութիւններ, մոտք գործէ աղատ, բարեկարգ կեանքը...

Կէսօրին գնացել էի տեղիս լաւ ճաշարաններից մէկը: Այդ օրւայ խօսակցութեան նիւթը բոլորի մօտ՝ գիշերս պատահած դէպքն էր: Տեղիս հայերը և յոյները չէին կարողանում ծածկել իրանց զարմանքը, որ քրիստոնեան կարող է իւր պատիւը պաշտպանելու համար զէնք բարձրացնել տաճիկ օֆիցերի դէմ:

Ես ցանկանում էի տեսնել և տեղիս հայոց աղջկանց վարժարանը, որ զետեղւած էր Գ. եպիս. Սրուանձտեանի հեռացնելուց թափուր մնացած առաջնորդարանի ընդարձակ շինութեան մէջ: Երբ պ. տեսուչ Դ. Քալանթարեանի հետ մօտեք ուսումնարանը, նարնջի և ձիթենի ծառերով պատած ընդարձակ մաքուր բակում խաղում էին վայելուչ հագւած աշակերտուհիներ:

Ներկայ գտնւեցայ մի քանի դասերին: Նախ բաւարար տպաւորութիւն էր թողնում վարժարանը. նա նմանում էր ռուսա-հայերիս համեմատաբար բարեկարգ ուսումնարաններին: Աղջկանց վարժարանն էլ, ինչպէս որ տղայոցը, բաժանւում էր երկու մասի՝ «Ծաղկոց» և «Ուսումնարան»։ Ծրագիրը համարեա նոյն էր: Մաղկոցը երկու դասարաններ ունէր, իսկ ուսումնարանը՝ 4: Աշակերտուհիների թիւը՝ 251 էր:

Այս երկու աղգային վարժարանների վերայ լինում էր տարեկան ծախք 600 օսմ. լիրա (5.500 ր.), որը մատակարարւում էր՝ աղգային սնդուկից (150 ոսկի), ծնողների վճարներից (350 ոսկի) և վիճակահանութիւնից ու հանդէսներից (100 ոսկի) ստացւած գումարներով:

Տրապիզոնում կային և հայոց մի քանի մասնաւոր մանկական դպրոցներ, մօտ 200 երեխաներով: Այնպէս որ ամբողջ քաղաքում

սովորող հայ մանկտույ թիւը հասնում էր 1.200-ի, որ համեմատած հայ բնակիչների թւի հետ՝ 6.000, բաւականին մեծ է՝ 20%, մինչդեռ թիւրքերի մօտ՝ սովորողների թիւը 1.450, իսկ բնակիչներինը 21.000, այսինքն 6%: Տրապիզոնում յոյների թիւը 10.000 է հաշւում, բայց տեղեկութիւններ սովորողների մասին չը կարողացայ ձեռք բերել:

Նոյեմբերի 30-ին, երեկոյեան ժամի 8¹/₂-ին, Տրապիզոնից Բաթում պէտք է գնար աւստրիական «Apis» շոգենաւը: Միւս օր, առաւօտեան, նա Բաթում կը հասնէր: Ես վերցրի տոմսակ:

Երեկոյեան ժամի 5-ն էր, երբ ես պ. Բալանթարեանի և երկու ուսուցիչների հետ դիմում էինք նաւահանգիստը: Զիապան Սիմօնը, որ չէր գնացել զիւղը որպէս զի ինձ ճանապարհ զցի, մի մշակի հետ իրերս էին տանում: Մեզ պաշարել էին ցնցոտիներով ծածկած մուրացկան երեխաներ և աղիողորմ ճշալով ողորմութիւն էին պահանջում:

Մովսիսին շատ քիչ ժողովուրդ կար: Մի խումբ մուրացկաններ, որոնց մէջ և չարսաւներում փաթաթւած տաճիկ կանայք, շրջապատել էին ինձ. մինը փէշիցս էր քաշում, միւսը թւքերիցս, երրորդը օձիքիցս և բոլորը ողորմութիւն էին խնդրում, որպէս զի ինձ բարի ճանապարհ մաղթեն:

Ափին շինւած էր մի փոքրիկ փայտեայ պահանորգանոց (ծՅԱՅԱ), ուր նստած էր մի պաշտօնեայ. մի այլ տաճիկ, որը և ափին կանգնած երկու-երեք մակայիների տէրն էր, վերցրեց անցաթուղթս, տարաւ նշանակել տւեց և մի քանի ղուրուշ «բախշիշ» վերցնելով որպէս զի իրերս չը խուզարկի, հրաւիրեց մեզ իւր մակոյկը, ինքն էլ նստեց մեզ հետ և հրամայեց թիավարին մղել, շարժել տեղից:

Խազազ, պարզ երեկոյ էր. երգելով սլանում էինք կապուտակ ալիքների վրայով դէպի վիթխարի «Apis»-ը, որ կանգնած էր հեռւում: Ահա և նորա կողքին իջեցրած երկաթեայ սանդուղքները. մենք վեր ելանք և մտանք նաւասենեակը:

Ժամանակ էր արդէն սանդուղքները բարձրացնելու, և ինձ ճանապարհ զցող բարեկամներս բաժանւելով ինձնից՝ նստան մակոյկը: Նոքա արդէն հեռացել էին այնքան, որ հազիւ էին նշմարւում. բայց ես դեռ կանգնած էի և նայում նոցա կողմը:

Արեգակը մայր էր մտել: Եղանակը սկսում էր վատանալ: Որոր-
ները (ՊԱՅՅԱ) անհանգիստ ճշալով և ցած ճախրելով դէս ու դէն էին
թաչում: Յուրտ քամին սաստկանում էր. մէզը թանձրանում:

Մթնել էր բոլորովին: Քաղաքի տներում վառւած ճրագների
լոյսը աղօտ թափանցում էր մառախուղի միջից: Նաւածածկի մի
սասում, վրանաձև քաշած կտաւի տակ մի կերպ յարմարել էին հայ
և յոյն պանդուխտները, որոնցից մի քանիսը իրանց ընտանիքներով էին:
Ունեոր ճանապարհորդները փակւել էին յարմար, տաք, լուսաւոր
սենեակներում:

Արդէն ժամի 9-ն էր: Անձրեւը սաստկանում էր. քամին խփելով
կայմերին սուլում, շառաչում: Սիրոս չէր տալիս իջնել ներքև: Ահա
նաւապետը նշան տւեց. նաւաստիները այսկողմ ու այն կողմ վազվը-
զեցին. խփեցին զանգը. բարձրացրին խարիսխը. սուլեց և շարժեց
տեղիցը վիթխարի «Apis»-ը պատառելով և յետ մղելով ընդդիմա-
դրող ալիքները: Հեռանում ենք Տաճկաստանից. ծովափը և ճրագները
կամաց կամաց ընկղմւում են գիշերային մթու թեան մէջ. տես՝ մարեց
և վերջին ճրագը. մեր շուրջը այլ ևս ոչինչ, բացի ալէկոծւող անեզր
ծովից և մութ-կապարագոյն երկնքից: Յուրտ է և տխուր....